



Fundasaun Mahein (FM), 28 Marsu 2018

Komunikadu Imprensa

## **FALINTIL-FDTL: Husi Militar Polítika ba Militar Profesional**

*“FALINTIL-FDTL labele tama partidu polítiku, la bele halo polítka prátika maibe sira tenke hatene polítika estadu demokratiku ninian - Xanana Gusmao, Primeiru Ministru no Ministru Defeza no Seguransa 2007 – 2015”*

Asuntu preokupante ida iha tempu sira ikus ne'e, diskusaun no observasaun públiku liga ho militar no polítika iha kontextu polítika atual Timor-Leste nian. Portantu asuntu sira nune'e dalaruma bele kria polêmika no sempre akontese iha nasaun hotu-hotu tantu nasaun dezenvolidu sira no nasaun sira ne'ebé foin dezenvolve.

Fundasaun Mahein (FM) nota katak diskusaun no observasaun sira ne'e mosu bainhira Chefe Estado Maior General FALINTIL-FDTL (CEMGFA) Major General Lere Anan Timur nia deklarasaun iha media kona-bá empase polítika ne'ebé Timor-Leste hasoru. No Antes ne'e mos mosu ona resposta ida husi CEMGFA Major General Lere Anan Timur ba jornalista sira kona-bá ninia pozisaun bainhira reforma husi FALINTIL-FDTL fila ba vida sivil no involve iha partidu polítika. CEMGFA Major General Lere Anan Timur klarefika katak deklarasaun sira ne'e nu'udar veteranu no iha obrigasaun fo nia opiniaun ba asuntu sira nasional. Katak la iha ligasaun ho pozisaun atual nu'udar ulun boot FALINTIL-FDTL nian. Maibe iha sorin seluk asume hela kna'ar nu'udar CEMGFA – FALINTIL-FDTL.

Istoriamente FALINTIL mai husi Partidu FRETILIN nu'udar liman kro'at FRETILIN nian hodi responde ba situasaun iha tempu ne'eba. Iha ne'ebé FALINTIL moris iha loron 20 Agustu 1975. Maibe FALINTIL hetan mudansa boot tuir evousaun funu ne'ebé Timor-Leste ultra-passa no sai ona husi FRETILIN no FALINTIL hala'o lolos deit nia kna'ar hanesan militar to'o funu ramata.

Hafoin Timor-Leste hetan fila-fali nia independensia FALINTIL transforma husi forsa girilia ida ba forsa konvensional iha tinan 2001 maka FALINTIL-FDTL. Katak militar sira hala'o nia kna'ar tuir deit Konstitusaun no lei sira. Kna'ar sira nune'e hatuur ona

iha Konstitusaun artigu 146 FALINTIL-FDTL nu'udar institusaun ida apartidaria, Estatutu Organika FALINTIL-FDTL nian 2006 no Estatutu Militar FALINTIL-FDTL 2014 define bandu militar sira partisipa direta ka indereta iha atividade sira polítika ka partidu polítika. Nune'e mos Lei Defeza Nasional 2010 artigu 11 hatete FALINTIL-FDTL hala'o servisu ba povu no hakruk ba determinsaun sira husi poder polítiku demokrátiku, la'os ba partidu polítiku tuir termu sira husi Konstitusaun no lejislasaun sira ne'ebé tama iha vigor.

Maske nune'e, politikamente to'o ohin loron estrutura lider sira FALINTIL-FDTL nian sei domina husi eis membru FALINTIL sira no maioria sira hotu foin maka apriende no hetan treinamentu profesional militar iha tempu badak no depois Timor-Leste hetan independensia. Ne'e mos sai obstaklu ida ba mediu prazu ninia atu dezenvolve lolos institusaun militar ida ho independente no profesional tamba sei defisil oituan atu haketak FALINTIL no FALINTIL-FDTL. Husi kestaun ne'e bele dehan katak FALINTIL-FDTL seidak hala'o nia funsaun totalmente hanesan institusaun militar profesional tamba emosionalmente no psikoloziamente membru eis FALINTIL sira sei defisil adapta no koloka sira nia-an ba regras instituisaun militar. Isteria FALINTIL bele influensia hahalok no polítika FALINTIL-FDTL ninia iha kualker tempu.

Iha kontextu ida ne'e, importante tebes bele iha diskusaun no sujestaun husi públiku. Hodi hatuur lolos pozisaun militar nian tuir Konstitusaun no lei sira. Portantu iha kondisaun balu bele lori militar sira koko fo nia influensia iha asuntu sira polítika bainhira kontrolu sivil ne'ebé la objetiva. Nune'e mos autoridade sivil ne'ebé seidak iha kapasidade naton implementa kontrolu ne'ebé rigorozu ba polítika militar nian liu-liu iha asuntu sira foti desizaun nian. Nune'e mos influensia seluk husi fator istoria funu libertasaun nasaun nian.

### **Rekomendasaun**

1. Rekomenda ba Orgaun Soberania sira hanesan Prezidencia Repúblika, Parlamentu Nasional no Governu kontinua fortifika kontrolu ne'ebé objetiva no rigorozu.
2. Rekomenda ba FALINTIL-FDTL hala'o nia kna'ar nu'udar institusaun militar ida profesional tuir termu sira husi Konstitusaun no lei sira, no hakruk deit ba determinasaun sira husi poder polítiku ne'ebé eleitu demokratikamente.

Atu hetan informasaun kle'an liu kona-bá asuntu ne'e bele kontaktu:

**Nélson Belo**

Diretor Ezekutivu

Email: [direktor.mahein@gmail.com](mailto:direktor.mahein@gmail.com)

Telemovei: (+670) 78316075 ka 77561184

Website: [www.fundasaunmahein.org](http://www.fundasaunmahein.org)